

小倉山房詩文集

冊
七

序

隨園先生古文三十卷以駢體六卷爲外集命英序之英按散行文尙矣然體裁必相題而作常讀韓昌黎黃陵廟碑柳子厚湘源二妃碑索索無味令人不得不思王楊盧駱蓋題本倣詭難以質言而表啓賀謝之類無甚意義非徵典不文非耦語不莊先生于此體不多作亦不輕作存者若干古藻繽紛大氣旋轉足冠一朝英擬學李善注文選以公之于天下苦讀書不多未敢貧相妄測乃先爲之揭其立言之旨而箋釋之功姑俟諸異日常州受業門人翰林檢討李英拜撰

尊安錄

[illegible]

題隨園駢體文

飛書用枚臯典冊用相如子雲實有言兼者其誰與文章有儷體六經開權輿
凡物比奇耦整散爲密疎取材各有宜載道無差殊揚馬盛西京班張冠東都
典論推七子繼美稱庾徐皆伸七襄手共握璇璣樞袁公秀江東珥筆游蓬壺
是古制誥才學士同中書顧以沈宋身出曳黃裾仕宦忽不樂買山賦閒居
栽花作友朋列屋成畫圖發揮巧匠心結構隱退廬萬卷圍一身才氣橫太虛
位卑乃著作李翱言有諸詩文積三篋億萬光明珠談笑出五能霑漑卿大夫
戶牖筆研陳瓶甕楷墨儲皇皇四六文雲霞相卷舒百家入箴縷羣史供庖廚
一索貫萬錢任沈顏謝俱文律一動搖宮商卽奔趨詞源一沃蕩河海咸灌輸
趣昭事益博慮周藻相敷手持注水箭放溜決川渠思風鼓言泉造化不得拘
武夫與悍卒願爲老鐵奴序傳祖十翼表啓根三謨銘志列俎豆廟碑肅瓊琚
以意立真宰以氣爲匡扶彩繡赴纂組英華恣含咀花骨屬天稟綺靡亦其餘
翡翠戲蘭苕鴛鴦立芙蓉纏綿風月懷曲曲相縈紆此體有正宗不收歐陽蘇

何況陳迦陵碌碌章與吳我胸無書籠我腹非冷爐曾職應付文同官笑其蠶
自慚張伯松不識揚雄徒公文我獨嗜負弩充前驅敢學皇甫謐佛頂強加污
乾隆己丑落燈夕館後學蔣士銓題

小倉山房外集目錄

卷之一

表

擬乞假歸娶表

爲尹太保賀平伊里表

爲莊撫軍賀平伊里表

爲黃太保賀平大金川表

代江南紳士謝萬壽恩科表

序

鶯脰湖莊詩序

萬柘坡樂于集序

送姚次公刺史之景州序

許南臺悼亡詩序

送尹宮保熱河陪宴西戎序

卷之二

序

贈樊生序

尤貢甫出塞詩序

紅豆村人詩序

周石帆學士西使集序

繡餘吟序

送梅循齋總憲歸宛陵序

李紅亭詩集序

岳水軒詩集序

陳古漁詩概序

王郎曲序

爲溫皆山吏部作

卷之三

序

尹公七旬生日授文華殿大學士序

孫小玫簪花圖序

尹似村公子詩集序

竹軒小集詩序

送尹太保從兩江入閣序

瞻園小集詩序

俞楚江詩序

瞻園兩公子送行詩序

尹文端公詩集序

熊蔗泉觀察詩集序

祭文

代渤海相公祭尹太保文

祭吳桓王廟文

公祭襄勤伯鄂公文

檄吳縣城隍神文

祭盧恭人文

卷之四

書

上尹制府書

答王厚齋書

與蔣苕生書

與延綏將軍書

與雨林似村兩公子書

上台觀察書

慰蔣用菴侍御失火書

與楊蓉裳兄弟書

卷之五

啓

代許方伯爲高太恭人徵詩啓

謝金撫軍薦博學鴻詞啓

擅責旗廨謝岱將軍啓

謝薦擢高郵刺史啓

上尹制府乞病啓

爲黃太保賀經略傅公平大金川啓

謝蘇州太守趙文山啓

賀尹太保側室張氏封一品夫人啓

謝瞻園託大中丞賜牡丹啓

爲雲華君翠袖圖徵詩啓

謝尹太保和詩啓

謝慶侍郎贈灰鼠裘啓

代請熊絳齋先生重赴鹿鳴啓

募修成仁菴疏

卷之六

碑

任勇烈公神道碑

御祭卞忠貞公墓紀恩碑

重修于忠肅廟碑

兵部左侍郎凌公神道碑

東閣大學士蔣文恪公神道碑

六營公立兩江總督尹公去思碑

餘杭諸葛武侯廟碑

墓志

莊西麓先生墓表

諸封奉政大夫江南左營遊擊孫公墓誌銘

諸封資政大夫常德府知府張公墓誌銘

諸封奉政大夫丹陽縣知縣魏公墓誌銘

汪君楷亭墓誌銘

客吟先生墓誌銘

聰娘墓志

卷之七 補遺

代祝兩江節相渤海公七十壽序

陳涇南修禊詩序

金賢村太守詩序

悔軒先生六十壽序

謝渤海相公元旦賜鹿豕鵝鴨等物及福字啓

爲章太宜人七十徵詩啓

郡文學呂君墓誌銘

孫薇省亡妻王孺人墓誌銘

徐君禮珍墓誌銘

陳淑蘭女子詩序

劉霞裳詩序

贈儒林郎翰林院待詔厚齋項君暨姚安人合葬墓志銘

贈中議大夫孝廉隱谷孫君暨范太淑人合葬墓表

卷之八 補遺

禮親王世子詩序

思元主人詩序

陳檢討填詞圖序

宮闈雜詠序

清娛閣合刻詩序

公祝奇麗川中丞五十壽序代

恩賜世襲雲騎尉羅漢門縣丞陳君墓誌銘

重修錢武肅王廟記 代杭州李太守作

小倉山房外集卷一

錢唐袁枚子才

擬乞假歸娶表

臣聞五算徵民嘉禮首隆牀合三清論職詞臣本屬闕曹故知納幣親迎卿士可以入告越境反馬春秋不譏曠官況乃宦在婚先妻因夫貴釋褐與結褵並賦花釵與爵弁齊明長源成婚北軍供帳敏中來婦金紫迎風凡文人未有之榮皆聖代遭逢之盛欽惟

皇帝陛下兩儀合撰三皇如春秉龍德而山澤通吹鳳管而雌雄應雖上林鳴鳥無不帶露雙飛卽太液游魚亦各銜恩逐隊固已民無怨曠草盡繁蕪臣西浙童牙寒門白望十二歲舉茂才二十歲舉鴻博樂昏未擾卽來觀國之光皇雅未歌無暇房中之奏是以十年不字三族無虞藉瑟琴平學道之心懼兒女累風雲之氣雉朝飛而有曲雁宵奠以無聲茲蒙皇上聖恩選臣爲翰林授

臣爲吉士才非李白登七寶華牀學愧康成註三商昏義采蘋采藻方陳太史

之詩一陰一陽未卜家人之卦因五夜之待漏驚三星之在天愧六禮之行遲
感九重之恩早賜面藥口脂於漢臘男子受之而不芳考褰衣褴褛於周官鰥
生讀之而有羨蓬山風冷東觀宵長簪筆則金粉飄零早朝而衣裳顛倒偶然
割肉無可相遺卽賜沐湯不願居外青綾被好孤熏郎署之香黃紙緘封虛貯
孺人之號仙侶疑其命隻中涓笑作童真如臣者想亦媒氏所平章相公所調
燮者歟今乃故鄉冰泮下達書來或盼遊子以倚閭或布几筵而筮日鄰夸衣
錦畫可還鄉兒饜君羹歸當貽母承筐無實已歸妹之愆期有女懷春非吉士
其誰誘而況單鳬寡鵠豈宜濫列鸞行介特孤丁未敢纂修吉禮伏求 皇上
賜臣歸田之假成臣合巹之榮雙鳳闕前許借飛龍之殿三神山下輕回弱水
之船取清俸以陪門五兩不過率陰臣而拜闕九十其儀將見燭撒金蓮光來
天上袍披蜀纈香到人間史筆催妝銀管耀青盧之色天錢撒帳女牀聽鸞鳥
之鳴當天下有道之時我黻子佩趁父母俱存之日男唯女俞明年春水生時
屈指微臣來日步入磚而卽至不敢迷花歌昧旦以趨朝同聽警枕

爲尹太保賀伊里盪平表

臣聞王者大一統之義春秋復九世之仇古之聖人握金鏡秉神機固將亭毒八荒廬牟六合也然神禹導河不過積石秦皇立界止於臨洮軒轅轡野之師高辛觸山之務成湯三朶之伐周王鮪水之誓雖智竭囊底而功止寰中未有我武惟揚窮天之界如今日者欽惟

皇帝陛下一人有慶五嶽無塵海水不波閭閻訶無使者青雲干呂知中國有聖人固已絕地通天瞻雲奉律矣惟準噶爾夷部僻處西陲跳梁沙漠稽兩朝之文化煩列聖之天心楛矢來庭則許甘松之互市赤囊報警則鳴琅鐸以專征張弛異宜德刑兼用亦以事機有待夷性難馴故也今天誘其衷神厭其德達爾札與達瓦齊等篡弑相仍風災迭起撐犁不識敢倚天驕朝定無人自然烏散車楞吳巴什等率衆投誠阿木爾撒納等領軍踵至或吹蠡享使或勞面請兵或失鉢請除一官或燒當願當一隊國中牛馬盡向南眠天上旄頭早

看星落五單于爭立是匈奴降漢之年九節度出師正回紇尊唐之日我皇

上擴覆載之仁不置遠方於度外運照臨之智早悉此虜於目中於是牙璋先
頒金玦獨斷贊蔡州之伐惟裴度一人計烏桓之兵屈陳湯五指從竈上騷除
瀚海取灰盤指畫天山歸漢封君敏關者卽加顯擢袪衣作衛鳴鏑者俾作先
驅西北分兩道之兵聲勢動九天之上如太陽之沃霜雪所過皆消譬久旱之
得雲霓歸來恐後蛇矛未拔銀鵠先奔逐窮寇而狐尾頭低草降書而羊皮紙
盡但整六師而返不見一虜而還萬馬禁聲盡解鞍而蹴踡諸夷無事將買犢
以耕耘開墾門招壤奠之臣取流沙爲附庸之國惟聖人之德大斯不怒而威
亦王者之功高故有征無戰踐龍庭之草露偃春風出玉門之關花開內地伏
念我

聖祖遠滅延陀河西遺種我

世宗窮搜靺鞨黑水留州凡

祖宗累年未竟之貽謀皆

皇上一旦纂成之

鴻業金山擒車鼻本文皇漏網之魚渭水謁單于慰高祖平城之憾被我純續
戴我金犀飲朱提者三千人而未乾置驛遞者六百所而更遠從此受降城下

新來冠帶之民都護府中不用防秋之策禽黎呼毒望氣來庭煎鞏黃牴聞風
請吏拔銅柱以掃地取金人而祭天化此輩爲孝子順孫何嫌荒服呼中國爲
仙宸帝所都恨來遲臣職任兩江神馳九陛想北闕凱旋之日正南風解愠之
時愧臧旻之才遍數三十六國譯朱普之句敢增千百萬言一曲饒歌聽策勳
於太史兩階干羽願增喜於龍顏

爲莊撫軍賀平伊犁表

臣聞時不可失而知幾惟聖人功有非常而止戈惟王者歸邪星出國有降君
騶虞獸來邊無烽警是以漢臣中西域而立幕府唐皇取松外而置縣官猶欲
刻玉燕然鑄金青海況單極以外淳維之苗率土來歸無思不服求之邃古實
所希聞欽惟

皇帝陛下八紘靜塵十洲澄鏡久已填廬山于赤縣擁狼望於黃圖惟準噶爾
部落遠恃流沙荒驕大漠屢稽質子不供包茅我
聖祖萬乘親征掃蠟螭之絕塞我

世宗五兵暫戢貸鳥鼠之餘魂如後漢之與南夷七擒七縱比延光之於西域
三絕三通未嘗不以丹水之師遠期伯禹崇墉之伐深望姬昌也今達爾扎自
嚙焦梨達瓦齊形同尸逐牛羊不壯知突厥之將亡魚鼈無橋識東明之不渡
坐金牀以望太歲星拱中華祀獬豸而問大神巫誇漢威是以車楞烏巴什與
阿睦爾撒納等或舞天先至或嗅地旋來當是時也五幡遺孽只用筆答九塞
旋風但需鞭打倘杜崇拒單于之上表則安國必捲帳而自驚班超還疏勒而
先歸則黎弇以遠漢而自到懷皇仁者雖歌槃木議國事者爭棄珠厓 聖上
以爲非常之原黎民所懼先幾之務惟斷乃成在貞觀之拒康居雖云量力而
建武之辭西域終少雄圖乃射苑竹以卜西羌推棋枰而決大策贛盾一戟龍
麗十重網設周陸軍歌鐵拔以党項爲前導故知吐谷之風沙假北轆爲疑兵
遂抵焉耆之巢穴周道如砥漢將皆飛反首芟舍而奔者膚行如風繩行沙度
而來者視道若咫尺收黑山四百三之部落耀朔方十八萬之旌旗雪嶺橫天上
下搜而全無虜跡賢王伏地左右視而都是陪臣築三受降城置五屬國府使